





歸來稿序

詩以道性情者也三百篇中其言樂者令人欲歌  
言哀者令人欲泣蓋惟發於性情故能感人性情  
如此也自是以降時代不無升降其各抒性情則  
一而已矣有明李獻吉出謂漢以後無文唐以後  
無詩於是力持初盛之說中晚且不足取況後代  
乎予謂有詩人之性情不惟初盛可學也中晚亦  
可學也宋元明亦可學也使謂今人必學初盛則  
初盛亦當學魏晉魏晉亦當學漢漢亦當學三百  
篇而何以其調格絕不相似也錢牧齋譏北地謂



其牽率剽賊于聲調字句之間如嬰兒學語毫不  
能吐其心之所有卽其所言不無太過而拘拘步  
趨古人者必至于是予友李子蒼存負不羈才而  
又上下千古涉獵藝林交游海內名流錯綜其議  
論詩學由是益進然而蒼存不盡恃此彼其胸懷  
浩落性情原自有詩卽語涉詼諧皆具風人雅致  
故揮毫着紙時而溫厚和平時而沉雄激烈時而  
濃郁豔麗時而澹遠超脫不得專指之爲漢爲魏  
晉也爲初盛爲中晚也爲宋爲元明也發于性情  
不拘一格蓋不至如牧齋之所譏者此之謂真詩

而已矣已巳初夏予與蒼存偕來京師過從唱酬  
殆無虛日辛未春蒼存南歸余畱京邸閱兩歲復  
入都予索其近詠乃出詩百餘首名曰歸來稿蓋  
自出都後或感懷或贈答或咏物濡墨吮毫皆寫  
其性靈之趣不規規蹈前人窠臼而力與前人爭  
勝者也予謂珠光劍氣亟當出見人間蒼存曰子  
其爲我序之夫子豈能序蒼存之詩哉然讀蒼存  
之詩不覺性情勃然有動也遂率筆書之如此康  
熙甲戌壽州同學弟俞化鵬序



後圃編年稿卷九

盱眙李嶠瑞蒼存

歸來稿

起辛未四月  
盡壬申三月

歸自京師緘子無疆菊村先後枉過因賦  
長句四首為答兼呈母舅和仙先生

禿髮中書氣力微空言苦索要人稀長卿本是題  
橋出季子何曾佩印歸千里風塵羈旅耐三年魚  
鳥故園違陶家秫米龐家黍准備躬耕懺昔非  
生涯決計問山阿舊雨依然肯見過僕本恨人應  
抑塞公真長者念蹉跎茫茫天下牢愁在刺刺燈



前軟語多踏實便須商稼穡莫言京國事如何  
筋力空從道路拋燕山塵尚在綈袍巧非夷甫無  
二窟愁是安仁有二毛鋤豆早尋盛草畚打魚已  
買刺船篙故人諄切詢無恙敢向春風首重搔  
貧交先後到柴門不笑虞翻骨相屯松菊已全荒  
栗里黍雞猶喜具羌村崢嶸履歷新詩卷消遣光  
陰老瓦盆寄語渭陽王武子如今叔寶戀丘園

和仙先生

謂予仍當北游故有此句

不到緘子山莊三年所矣辛未春日歸自  
京師過無悶園挑燈話故予雅不勝酒近

又以奔走廢詩而緘子吟興勃然豪飲特  
甚自慚不堪鞭弭周旋當遠避君三舍矣  
漏三下堅請就寢不得乃賦四十字應命  
薊苑三年客南村久未過到門人復聚繞屋樹加  
多轄愧相投力詩愁見索苛不勝春釀猛千萬量  
東坡

題小園壁二首

山中舊種樹成圍漂泊今纔叩竹扉紫燕呢喃黃  
鳥喚都如知道主人歸  
榆筴飛錢柳擲綿故園風物總依然如何孟浪拋



他去年在天涯住幾年

夏日病中

北風牕下榻斜支肺病怔忡熟睡宜徑在頗難全  
謝客家貧已到不延醫方書細檢芸香帙藥汁頻  
傾硯水池愛惜精神防暗耗兼旬閣筆戒吟詩  
呢喃燕子引雛頻土屋時時一欠伸放進清風差  
失暑燕多苦茗漸生津薰衣舊藝菖蒲瓣煮粥新  
加薏苡仁若道牀幃猶未淨惟應并遣竹夫人

春陰館午睡

竹牀蒲簟儘麤材一枕淳于入大槐水斷終朝無

客到牕多四面有風來茅簷日影桐遮盡紙帳蠅  
聲扇打開午過涼生夢初覺花梢蝴蝶恰飛迴

和戚緘子無悶園十二詠

移竹

篔簹谷口舊干雲帶土移來醉夕曛日日平安詳  
細報此君何幸得逢君

種蕉

摩詰曾描帶雪姿閒園又見種枝枝須安筆硯當  
牕下一葉題他一首詩

鈔書



塵灰堆裏撥陳編  
肌望何年始得仙  
誤過半生還  
不怕蠅頭小字寫燈前

洗硯

斐几晴牕展硬黃  
淋漓墨汁潑濃香  
詩人弄筆無閒刻  
累得奚童洗硯忙

聞笛

月下誰吹笛不停  
幽人酒醒得柯亭  
他時我舉王猷事  
訪着桓伊也要聽

補牕

補就疎牕拭淨塵  
零星破紙又重新  
設牀只在通

風處穩作羲皇以上人

剪梅

家是孤山雪後圖  
繁枝出手自刪除  
春風到日開千朶  
還要從君借蹇驢

灌菊

陶家名本植籬東  
運水親澆夏日中  
斗酒到秋應自勞  
灌花已費許多工

掃葉

霜重庭柯葉墮頻  
臨風自掃亂溪濱  
作書未必能勝紙  
煮酒何妨且代薪



烹泉

中散從來嗜麪生酒餅莫逆勝茶鐺  
緘子蓋雅嗜酒新泉活  
火煎蝦眼又奪盧仝陸羽名

觀棋

陣列楸枰戰屢挑死生黑白講求勞局中爭執憑  
低手只有旁觀一着高

畱燕

雙雙覓壘立簾鈎花裏銜泥日不休養得雛成休  
便去先生要與話春愁

暑夕答菊村

苦茗清泉月一廊絺衫蒲簟竹方牀風來不許蚊  
雷進雨過差添水氣涼南海芭蕉裁扇大西江茱  
萸作花香少思多睡閒憑我不似詩翁弄筆忙

偶題

久作他鄉客家山樂似忘草廬今得卧麥飯覺生  
香活水收新甕殘編出舊箱絕交嘗有論不惹客  
登堂

土屋苦多暑開牕放好風秧針撩白鷺柳葉破青  
蟲焙藥臼雙足栽蔬畦一弓殷勤祝竹母生子勝  
而翁



習氣頗除却兼旬稀作詩書不黏蠹殼硯匣網蛛  
絲醫到每談藥僧來時對棋晚晴出斜照池上浴  
鷓鴣

梁肉原無命生涯問甕蓋桑陰鳴樹鴨土人呼戴水勝為樹鴨  
面叫秧雞草色攀牆長苔痕逼砌低鷓鴣無遠志  
將就一枝棲

買鹿

我生山野姿於世百無用惟從丘壑間購得禽魚  
種常畜鶴一隻呼名即來從昨者被人斃林逋那

勝痛

子養一鶴已十餘年頃以池涸就飲南澗誤為田父所斃

池亭正寂寥無物堪娛

弄忽逢鹿數頭來從霍山洞探囊得青錢不嫌索  
價重買置小園中用補胎禽空乍到尚跳梁漸馴  
不驚恐成羣自牝牡逐隊如伯仲出入聽優游行  
息隨恣縱貧家百件稀草生品獨眾終年食有餘  
不愁爾輩俸啾啾鳴有聲儻儻走接踵養過三百  
載理必堪乘控騎上青城山脚踏飛雲動若逢徐  
元直相攜一笑闌

漢銅尺歌為孔東塘國博賦

井序

國子博士孔東塘先生博雅好古為文有宋大家  
之風康熙甲子 上幸闕里以講大學周易稱



旨特授是官會 上念淮揚水災命副少司空孫  
公疏濬海口先生使節所臨不廢嘯咏遇古名勝  
輒畱連不能去嘗於江都閔氏得銅尺一枚有文  
曰慮侯銅尺建初六年八月十五日造慮侯其人  
不可考建初則東漢章帝年號也先生以為漢去  
周末遠且禮經皆出漢儒漢尺之存即周尺之存  
也乃以歸之曲阜凡造先師廟禮樂器皆準之予  
客京師先生出此尺相示索予為歌以傳於世會  
將南還遂不果作頌歸故園杜門結夏眠食之暇  
走筆成長歌寄之先生固嘗為此尺作記與辨矣

而未有詩其見予言當必輒然而更有所賦也

博士宣尼老孫子生平志在垂青史文章道德冠

一時魯人之論皆如此我見新城司馬公

王公士禎公無

時賢在眼中時時屈指天下士於鄉只數斯人雄

憶昨 翠華臨闕里 御案說經稱 上旨格外

新恩特授官教導生徒來國子東南民力竭河防

瓠子秋風歎武皇廷推宜副司空出 帝曰俞哉

爾往襄先生耽古從天性好事時時多逸興星軺

奉使出京華江山到處求名勝廣陵自昔聚風流

故物遺踪往往畱閔家忽贈銅尺一蝌蚪文存識



石園集卷之九  
七  
慮侯慮侯名氏史遺載年紀建初認時代朱碧繡  
錯光陸離漢尺之存周尺在指量黍試辨微茫不  
爽絲毫一寸長三代法物邈難見瑚璉收呶思夏  
商今者得之聚由好珍藏謹貯先師廟禮樂凋零  
器缺如鼎彝鐘簋皆憑造樅橈湖海朝暮勤三載  
歸朝難奏勲清狂但比蘇司業冷落仍如鄭廣文  
我客長安嗟不偶輕薄兒郎竊相醜獨有青眸一  
見憐日說項斯不離口手持漢尺索我歌謂我歌  
足奴陰何我時買棹急南返蒼皇無與聳肩哦結  
夏故園消永晝搜索枯腸苦吟就只愁信筆肆塗

鴉蚓竅蠅聲詞語陋燕山迢遞白雲昏雙鯉何時  
到薊門詩古能如尺古否還向先生索一言

積雨新霽菊村蕭仞茗話限韻二首

風捲濃雲似葉輕蔚藍天氣放新晴嬾人晝愛搯  
頭枕閒客親烹折脚鐺石徑苔深辭蠟屐山田雨  
足養香秔葛衫偏袒無拘束信口憑君議論生

仙人冲上茗香輕

霍山茶品近以出  
仙人冲者為第一

添得精神是乍晴

坐近好風常徙席收多新水不論鐺僕更叔夜推  
多垢師事淵明解種秔才盡江郎稀好句無言可

謝楮先生

菊村見過相對十日連有佳什見貽而  
子纔得詩一二首耳故以此句解嘲



緘子書來許卽枉過旣而不至因次前韻  
以寄

康樂從來屐齒輕山程不礙走新晴竹筒自到書  
雙紙野店頻賒酒一鐺涼就水亭堪送暑貧供麥  
飯不須杭門前怪底登音杳孺子牀頭蘚欲生  
北牕風透葛衫輕屋角班鳩午喚晴土銼幾炊元  
直黍村醪空貯景山鐺老鶯的的猶呼夢新水汪  
汪欲秀杭別久豈惟思絮語驚人詩句待君生

寄懷伯生需次都下并呈劉大山

桃花紅重柳條輕記得春風別 帝京君授一官

猶有待我憑三賦合無成山程信斷鴻難見水驛  
秋來蓼又生才子建安誰獨步鄴臺近日數劉楨  
溪上晚步

芒履輕隨脚溪行落照斜遠天如許鴈衰柳若干  
鴉經水橋無板迎霜荻有花年豐光景好秧馬滿  
村譁

閏七月二十八日子入泗濱有客邀遊城  
東新橋泛舟中流抵暮而返歸後紀事率  
得一篇贈同游諸君子

河伯肆不仁故門 氏雉堞走魚蛇十載於茲



矣人烟雖已稀壯哉一壕水新橋在東門創從新  
刺史周遭住漁家風日脩然美我作長卿游濩落  
羈燕市鄉井總茫然三年不到此今來入舊城長  
堤憇芒履幸未爲人嫌殷勤買舟俟船頭設茶鐺  
船尾置酒匝船牕四面開船篷半空峙一篙撐中  
流細浪清泚泚欲行隨卽行欲止還卽止湖光非  
餘杭荷花似西子搖曳正中央鴟夷儼相擬出手  
能采菱舉網堪得鯉楊柳間芙蓉輕閒致可喜故  
人皆詩人聳肩笑相視半醉興偏生吟聲颯然起  
湖州紫兔毫巴州彩鸞紙可惜主人翁來時忘二

氏腹稿未能書一以酒終始秋風襲衣涼夕陽映  
山紫長年搖舵還徐徐近岸艤子歌歸去來諸君  
皆曰唯捨舟各登塗回首向中泚此舉信可傳不  
佞敢不紀因思赤壁游蓋亦偶然耳文章妙天下  
不朽遂爾爾公輩豪於詩較我高倍筴我尚自命  
雄況公可畏蕙探囊出珠璣光怪驚下里安知後  
千秋不以坡仙比

隴上謠呈倪令君

有序

子邑不登凡數載矣庚午大旱至辛未五月不雨  
蝗生遍野食麥一空兼以怪風拔木壞民廬舍殆



盡所在蕭然人不聊生邑令會稽倪侯齋戒祈禱  
既而雨降歲以豐穰又能行寬簡之政催科不煩  
遠近安堵有野人歌於隴上言頗不文予適過而  
聞焉乃以韻語述之爲謠其詞曰

去年旱魃今年蝗蟲咄嗟哉四月風天之降殃曷  
其有終 茅飛垣覆我居無屋土焦原禿我食無  
麥 侯曰爾民艱只吾爲汝齋於庭吾爲汝祈於  
市 神之格思雨淋淋而種之播思苗欣欣而  
五月六月秧針綠七月八月稻花馥今我農兮三  
鬴足 有袴有襖有雞有豚有婦有子吏不到門

賽事興田歌唱天弗違侯之貺我有斗酒入城  
餉認得縣堂正南向

中秋夕同客登虛閣看月

兩年客裏度中秋今夕團圓理舊游畢竟故園明  
月好夜深引到小樓頭

梧桐枝上影披離點點清光照酒卮不肯遽從山  
角落分明要我贈他詩

桂樹花稀作淡香吟成擊鉢一齊狂能於好節傳  
佳話點鬼何須說武昌

露寒衣薄夜忘眠月過三更越惹憐若使世間無



我輩姮娥儘可不消圓

緘子屢約見過皆不果來中秋後八日忽  
叩柴門驚喜交集情見乎辭

郵筒幾度遞雙魚剝啄何曾問索居路僻非關新  
水斷家貧能致故人疎桂花香已過佳節驢子蹄  
纔到草廬詩體近來予鄙拙對君拈韻意躊躇

食蟹

撥棹招潮飽夜霜秋田網得入庖香中流放愧眉  
山老左手忙過吏部郎引醉畧傾黃甕酒去腥先  
搗赤芽薑涎垂自是饕餮癖蟊蠹蛸蚌一例嘗

送譚漢倬比部湖口權稅還朝

湖上星軺住匝年東南人說使君賢豈無孔僅囊  
中術不括弦高簿外錢烟水送歸無宿諾燕鶯隨  
載有新緣譚新買兩姬漢廷報績應稱最馬踏秋風到日  
邊

游快園贈主人

愛向山園暫避囂青鞵布襪走迢迢危樓難上頻  
攀榭小路原生細問橋嵌石松多髯覆面經霜柳  
老癭垂腰市廛占得幽居勝和靖風流故未凋  
予於近時制舉文字偶有所論坊賈請鐫



遂行於世傳至京師主考官有大志者友  
人俞扶九楊鳧令錢亮功輩俱致書相勸  
戒感歎之餘率成四律

文惟干祿立名輕雖屬空言故有程好醜何妨天  
下見是非聊用汝南評遺風意在師前輩謬種心  
憂誤後生不謂氣麤詞語戇當途觸惱幾公卿  
一帙迂談閉戶攤誰人傳布到長安書生固是堪  
漁物制府還非示怒官  
閣學某謂木菴官坊曰李某敢爾謂吾不能為江南總制乎示必有以中傷也  
舌在那能全結縮文工未必患譏彈無端弄筆真  
多事惹得諸公髮指冠

日永閒門雀可羅丹鉛一硯頰消磨行雲流水原  
無着射影含沙可奈何事出偶然休詫我人皆欲  
殺且憑他些些公論分明在季緒誰言好詆訶  
春城一別到如今千里書來藥石箴顧忌不存狂  
客態風波為慮舊交心秋田鴻鴈愁彈起午日蝦  
蟆避捕瘖寄語薊門三數輩潛夫從此入山深

輓張酌孝前輩

簪纓中歲棄野處道常豐世尚須前輩天胡奪此  
翁草書兼晉法律體得唐風今日人琴盡湖干舊  
宅空



後園雜句卷九  
次韻答俞扶九都下見寄

雞壇曾許與齊盟風雨河梁別後情被黜已甘過  
展季見推何足辱唐兄逃名自是年時願弄筆原  
非月旦評珍重故人新句好薊門千里問狂生

除夕題二絕句

椒盤土屋氣蕭蕭只有疎梅共寂寥一歲又教如  
此度人生堪得幾今宵

徑生寒蘚甑生塵門外都無餽歲人若比閬仙尤  
較冷却將何物祭詩神

正二日郊行

身閒隨處往蒼蹇踏晴垌天與春光好農占歲事  
靈風搖帘灑落雪化水零星節候今年早家家柳  
放青

客夜同緘子

芒履拚奔走生涯屬轉蓬畧無佳興在猶喜故人  
同木末終朝雨河干竟夜風客愁談不盡飲落一  
燈紅

普濟寺

天半鐘聲落迂迴一徑通草迎禪榻綠花映寺門  
紅春色隨人領茶香許客同必求眠息地畢竟是



山中

答錢震元見贈

龍泉利器早舒鋌知遇吳公比洛陽

震元爲太守丁公所  
知待以國士

故物傳家擅起色新詩脫口字生香  
殷勤花底傾深甕珍惜囊中得贈章  
無可爲君增重處不堪呼作丈人行

坐禹王臺雙柳下有懷莫崧臯太守

柳記當年植於今出屋高水深拖舊岸  
春到長新條愛樹登臺數開樽結客勞  
風流前太守畢竟是人豪

次韻答胡樹旃見懷

判袂金臺感各天雞壇寥落興蕭然  
半生事過無長策兩度書來喜去年  
貯墨烟青銅雀硯騰詩雪白錦江  
箋故人潦倒君休問壯志消磨不似前  
自從落魄賦歸歟湫溢三間卧敝廬  
躍馬情懷都不遂轉蓬氣味畧相如  
日蒸山脚花初放春到江南草又舒  
旦晚王猷動高興小舟直造戴顓居

戲爲美人嫁神仙歌

并引

予於夕陽山莊懸桐下美人圖一幅而又祀純陽  
子於十步之內壬申上巳偶攜客爲禊飲因戲謂



曰美人獨居殊大寂寥既與純陽子爲鄰若以嫁  
之當最便也客皆大笑曰然子遂歌以實之  
人言神仙必不復好色又言美人必不求適人信  
如此說神仙美人萬萬不能合吾謂是特老生常  
談未可與語格外之良因神仙幽居蓬頂上度一  
千年如一嚮餐霞服氣乘清風雖則高閒頗孤抗  
若使此時美人臨洞天豈不增佳況美人悄眠翠  
樓頭蝦鬚簾幙珊瑚鈎春風秋月幾番度三五二  
八寧長畱若使此時神仙到蘭幃豈不添風流其  
奈美人神仙居自各或在天涯或地角相須縱殷

相遇疎中間寥寂稀媒妁神仙天而不離人美人  
人而近乎天兩者皆是宇宙怪竒妙麗之尤物缺  
一不可有而不聚又不全天下無不願嫁神仙之  
美人亦無不願耦美人之神仙神仙美人理難自  
作伐執柯柄者非予不佞其誰焉桃花有情初放  
藥一枝紅照春池水韶光駘蕩正可人周南固詠  
于歸矣兩家小影幸同居一園便是三生石上舊  
精魂人間此日不可少勝事天上終古誰謂無新  
婚我觀美人獨立梧桐底我觀神仙灑步雲霞裏  
默然卷舌無一言眉宇中皆帶歡喜東皇傳信已



分明千秋好合從茲始儒家典故迂腐不足依此  
舉何妨變通古六禮請以流鶯爲問名之使乾雀  
爲納吉之郎百舌爲催妝之客燕子爲隨勝之嬙  
榆錢爲納聘之幣柳絲爲繫馬之韁江梨爲傅面  
之粉海棠爲薰衣之香蛙鼓爲導行之樂蕉陰爲  
入夢之鄉曉烟爲同牢之食暮雨爲合巹之觴神  
仙居鄰美人室不十步遠綵輿入黃昏月白銀河  
清想見賀者奔騰一時都畢集風爲馭兮雲爲車  
仙之人兮紛如麻屏開孔雀傾流霞諸英酣飲皆  
歌斜太白在坐興最嘉醉後吟詩字似鴉東方小

兒尤善誇詼諧出口人人譁山莊一隙非仙槎異  
哉有此新郎新婦家良辰恰逢非意及從來遇者  
千之一古惟織女嫁牽牛鵲梁成在七月七神仙  
美人福命畢竟與人殊吉典纔舉便是三月初三  
日

涵清軒

牕几明如雪高軒吏隱宜漲過淮水後開到海棠  
時酒好看僧醉書多許客窺無煩出紙索不佞願  
畱詩

河上泛舟有訪



荇絲牽惹綠蘋斜一棹東風漾水涯寶積山邊芳草路石橋南去是他家

夕陽隔岸照簾櫳薄薄春衫不透風籠裏數聲鸚鵡喚門前一樹杏花紅

答杜謙吉

窮愁久分絕同聲忽有雙魚問耦耕自是范張緣  
夙好敢言李杜本齊名雞壇聊許通餘論牛耳終  
須讓主盟望斷海陵春水路論心何日得班荆

庚午冬酷寒異常園竹盡槁比年生笋弱  
甚詩以祝之

王氏家風舊何堪失此君前年遭酷冷比歲少清  
芬地薄根多結天乾葉未醺洋川存故本生子幸  
于雲



後圃編年稿卷十

盱眙李嶠瑞蒼存

歸來稿

起壬申四月  
盡癸酉三月

刈麥行

黃梅細雨聲  
脉脉大麥收  
過收小麥芒  
種節在端午  
前農翁腰鎌  
齊下田肩挑  
萬把堆場上  
野碓家  
家一時響我  
田數畝糞最  
稀積穗也高  
三兩丈去  
年蝗蟲損穉  
禾西成畫餅  
登不多今年  
一春萬事  
誤都指來牟  
作償具中牟  
良吏邈難期  
若冀兩岐  
我便癡三餐  
但得有所給  
卽不充餘敢  
怨咨南州



高人徐孺子自食其力勤舉趾麥當熟時往刈忙  
私心歡喜如雲黃瘠地所登堪作供我見無田不  
可種嬾絕書生怕去耕一犁那有千鈞重

午日偶成

蒜人艾虎掛當門又盡菖蒲酒一樽新竹惹風聲  
颯颯老雲釀雨氣昏昏雖無龍舫嬉前渡尚有榴  
花燦小園鸚鵡口頭稀惡論何須更教作人言

夏夜同緘子溪田步月

蠲詩減酒另生情避熱尋涼趁月明草徑悄瞞螻  
蝮過秧畦細聽桔槔行零星雲在天心散澹薄風

從俗眼生覺得醉吟翻少味不如閒步過三更

雨後聞新蟬

開到荷花日蟬鳴不約同一聲新雨後幾處夕陽  
中來往頻遷樹高低不礙風野人間見少聽此耳  
根聰

壬申生日答緘子菊村

半生迂拙路迤邐弧矢空逢此日懸焚硯久傷前  
事誤枉詩猶幸故人憐休心架上書千束得意門  
前水一田和就郢歌顏欲赤對君慙愧說增年

菊村送新安查氏墨



手把烏丸贈一封新安秘法舊來工堅疑魏氏臺  
邊瓦光奪秦人塚上銅欲濡頭難辭醉後未磨香  
已出函中却憐錯付塗鴉手枉累清閒楮國公  
予今年暮春以事羈城中辛夷花開竟未  
及見至六月忽又放一枝因戲成詠  
不復多開但一枝黃蜂粉蝶問丰姿如何補炫先  
生眼想爲春來未贈詩

次韻菊村水亭避暑

案上攤書只老莊世間惟此味差長陰陰鷓似娛  
摩詰閣閣蛙如笑子陽法茗正生眠後爽輕風又

送晚來涼水亭一隙何堪戀偏有新吟逼李唐

長夏閒居卽事十首

土屋尤生暑長天苦蘊隆香微覺菡萏陰重感悟  
桐書帙拋慵讀親交謝不通徑容排闥入只有北  
牕風

鼓吹常相傍鳴蛙似屬私葛衣猶染汗麥飯未傷  
脾爬癢嵇中散焚香韋左司豈惟諸事廢嬾到不  
吟詩

雨幸今年足新流溢野塘屋頽呼補漏田薄課開  
荒黃鳥啼叢木烏捷歇夕陽立秋期不遠早稻有



花香

赤脚踏層冰，癡難學杜陵。架欹扶用竹，牀破補加藤。餽飢須新煮，胡蘆要爛蒸。生涯君莫問，一半已如僧。

風熱積成疾，終朝惟跣科。醫方似文富，藥汁比茶多。樹密蜂爭界，梁空燕出窠。除書得新授，出守在南柯。

亭午難消渴，攜餅汲井華。松根陰出菌，柳腹爛藏蛇。紫墮簷前李，紅嘗圃後瓜。西南天作雨，又走阿香車。

四壁蕭蕭立，山廚絕似齋。婢炊喧闕米，奴爨請求柴。我故無長策，卿言亦復佳。但毋饑殺我，不必太安排。

閒到門如水，安仁比不如。舊修鋤豆器，新著養魚書。綠竹孱還灌，青苔滑欲除。埋頭差穩便，吾實愛吾廬。

野處罕拘束，襟懷常坦然。酒訛傾硯滴，塵誤拂琴絃。弱小憐朝槿，悠揚愛暮蟬。衣冠似難免，分付已全捐。

五字知招謗，其如癖久成。譬猶蟲自聒，豈與世爭



名竈下香山嫗堂前穎士伴我家都未有試請白  
鷗評

走筆答緘子索酒

新詩索贈景山壘浮蟻缸頭手急開明日叩門無  
別客青州從事訪君來  
好天不肯對空壘指點銀餅笑口開絕勝晉朝癡  
吏部夜深偷到甕邊來

涼雨輕風洗舊壘荷花池面報方開濁醪自此應  
增價能換先生好句來

無悶園中斗大壘

緘子有無悶園

尋常只當一瓢開應多下

酒君家物我要提壺自送來

得姜萬青訃

纔入金門便蓋棺早年應悔占雞壇耗空心血凌  
多士投遍文章得一官花管才餘猶未盡萱堂淚  
落那能乾

萬青丁內艱歸抵家十日而卒

煩君作記緋衣迫白玉樓頭

住可安

七夕 并序

余童子歲有友人爲言世傳七月七日織女嫁牽  
牛者以是夕天河不見遂相沿以爲填橋之事爲  
實有也不知烏鵲髡頂時令使然是夕天河未嘗



不見特漏下一二刻時往往其光爲月所掩至夜  
分復明如故人又漫不及察耳予聞其說驗之果  
然壬申七夕露坐小亭偶與家弟蕭仞追述二十  
年前之語因以一絕誌之

月光明處失銀河牛女誰曾代執柯烏鵲填橋題  
目好不妨千載共傳訛

獅子猫

高陽李文勤  
公寓園中物

獅子猫惟燕冀有尤然大比南方狗我客京師始  
見之鳴時訝是狻猊吼文勤諸孫畜最繁贈我一  
頭出寓園千山萬水遠攜返可憐老僕癡難言乍

到貧家如不屑餅罌盆盎遭都缺夜夜妨閑總枉  
然枯魚乾膾偷餐竭牀頭鼠陣走陸梁不許吾畱  
隔宿糧耳聞目睹豈虛渺那曾一躍誇身強舊養  
狸奴軀幹小從旁出捕翻雄狡爾獨安眠若未知  
皮毛豐厚終朝飽目光如炬棲花叢粉蝶黃蜂食  
欲空一心還想雀兒肉時時緣蔓攀高松出沒鼯  
鼯盈案几土屋儼同永某氏若逢道士李勝之  
見陸放翁  
詩畫入圖中應宛似客來見者皆大呵怪我畱此  
無用何我謂此猫或有說相國門前所見多

曝書



後園編年卷十  
秋陽紅值雨晴初曉起開箱自曝書新有遺忘麤  
檢覆舊粘垢膩細爬除癖論元凱差相近精較長  
源信不如竭蹶慙同蠹魚老空教半世費居諸

雨夜

愁對一燈清茅簷細雨生半疑非夜氣全覺是秋  
聲蟋蟀啾啾和芭蕉點點輕晚禾猶待潤明日且  
母晴

中秋夜與諸姪小集

快絕中秋月從來無此明澹雲三數點新鴈百餘  
聲水摘紅菱熟缸筩白酒生竹林諸姪在團坐到

三更

答馬蘅原給諫

掖省秋高地望清朝陽威鳳最先鳴士林謂此真  
遭遇 天子須公助太平別久敢期尋舊誼書來  
猶記問狂生漢廷欲補雖無闕封事新揮幾則成

野行

八月纔過半秋光已灑然碧天排早鴈紅樹咽餘  
蟬僧出山腰寺牛耕水曲田村村春脫粟碓響夕  
陽邊

又得長句一首



後園雜詩卷一  
西風酣舞葉婆娑夕照前頭過幾坡水涸蘆汀鴻  
陣少秫登村店酒帘多遠烟滅沒看難定小路迂  
迴走易訛驢背微吟時得句秋光真易引詩魔

九日偶成

又到登高節秋光爽絕倫暖畱楓葉韻晴養菊花  
神幸免催租吏差安落帽身濁醪吾自貰不盼白  
衣人

寄懷皆文厚文昆季

薊門射策敝貂裘落魄曾隨二妙游陸氏文章都  
俊偉謝家兄弟總風流玉山自產雙珠樹銀管爭

修五鳳樓記得黃金臺下別江楓葉赤又高秋  
馬糞烏衣澤未沉鳳毛雙價重南金名因獻賦傳  
偏遠學自趨庭得最深鴻鴈影高天濶落荻蘆霜  
重氣蕭森尺書一紙春風後消息何稀直到今

天長道中寄施訓方兼呈徐子述

心迫前期在疲驢緊着鞭白烟秋水路紅樹夕陽  
天酒憶仇家肆書憐薛氏箋若逢徐孝穆爲索玉  
臺編

經朱壽昌故里

烏雛識報恩羊羔解跪乳人生不空桑尋母非竒



舉奈何司農名嘖嘖驚千古得非緣今人愛官甚  
父祖我嘗客京華竊見公卿侶所重在黃麻時時  
銘肺腑高堂有垂白久已忘啓處訃音入國門恨  
不中塗阻以此思司農邈矣絕儕伍我捫孝子碑  
我尤詫介甫素用道自高薄漢唐如土主持一李  
定人倫成齟齬是豈經術耶不然奚見取

天寧寺袁宗安畱宿袁時歸自都下

薊門分手各天涯此日相逢楚子家客裏聯牀分  
布被燈前把酒話京華空堂矮枕聽清磬細雨疎  
林宿亂鴉我守青衫君墨綬驂驪何日脫鹽車

史相國道鄰墓道歌

廣陵城外烟彌望嶺號梅花搯矮嶂云是先朝閣

部墳孤兒死後招魂葬

謂參將  
史得威

憶昔鍾山王氣終潢

池赤子弄兵雄赤眉一旦戕更始火照甘泉徹夜  
紅洶洶天下悲無主諸老陪都謀夾輔定策誰人  
主福藩江東早卜成崩土四海中興望不侏那知  
天子了無愁華林園裏聞蛙日結綺樓頭鬪彩秋  
火醪飲勝三千竿後庭玉樹歌如瀉寵分僂子與  
蟲兒權付提婆兼大捨叔寶心肝本不同朝朝沉  
醉倚春風興寧殿上當除夕忽自愀然慘玉容



長秋侍杲恩下仰見天顏歡意寡近前長跪請何  
為梨園最苦無佳者貴陽虢虎坐中書首引懷寧  
九尾狐汲黯如何能在內周瑜自合請兵符澶淵  
實欲萊公倚出鎮天雄寧獲已大厦頽非獨木支  
金甌好任羣兇毀公方開府勢愈艱氣象江淮血  
脉乾議戰議和無定策缺兵缺餉有空歎興亡信  
自由天意四鎮紛紛比兒戲靖南頗是英雄人國  
讐未報惟爭地姜劉張呂各抽身竭蹶提師只一  
人敝舌難回處仲意上書猶觸國忠嗔燕都鼎定  
狡獪進塘報喧傳雷電迅一心只在殺東林雙耳

何曾聽北信也是宮陵運合灰晉陽甲又九江來  
志清君側談何易將在軍中已撤回寂無一卒防  
淮口萬丈河如平地走百匝兵臨報合圍單騎力  
寡空堅守東昏臣主睡方酣血表星馳枉再三外  
援莫思來積弩上游只要備寧南登陴望見新城  
墮臣力竭矣天心左地下請從先帝游捐軀甘受  
分屍禍往事於今五十年銅駝荆棘已茫然殘棋  
不復存餘劫荒塚猶看卧斷烟我來弔古捫遺碣  
秋色蒼涼邗水列蠅聚如尋弘演肝葉丹似染萋  
弘血記事碑陰是阿誰定哀之際用微詞清霜苔



後園雜詩卷一  
薛浮空地落照牛羊下冷陂青史芳名自千古松  
楸未種稀祠宇此日誰爲謝布衣當時不用王炎  
午君素裋崇自太宗亦聞宋祖錄韓通太平 聖  
世原無諱豈禁崖山哭大忠

獅昂大師方丈

蒲團頻借坐爲愛上方幽精舍匡廬亞高僧惠遠  
流楓梢霜氣晚竹葉雨聲秋午近呼齋飯鐘鳴對  
面樓

迷樓遺址

頽垣斷瓦冷斜陽煬帝當年大內牆金水橋邊無

錦纜玉鈎原上有垂楊葉紅似彩猶疑剪釵化爲  
泥不復香今日江都仍自好誰傳消息到雷塘

游棲靈寺次壁上新城公韻

山寺秋光澹似烟瓦鐺淪茗汲清泉雲嵐上面斜  
開路松竹中間別得天江畔秦川公子艇郭邊陽  
翟賈人田法曹去後風流少誰復題詩贈老禪

平山堂

堂開松竹杪曲磴緩躋攀地嵌蕪城裏名傳慶曆  
間岸連平野霧牕入隔江山彌勒龕如借終年可  
不還



同諸公飲張氏園

揚州女兒好滿頭都是花揚州園子豔滿眼都比  
娃我非石衛尉綠珠不肯賒我學謝康樂木屐尋  
幽遐林亭適在此紅橋水一涯諸公肯相伴曲折  
入竹筥雕欄燦明錦朱閣烘丹霞琵琶擁入坐鸚  
鵡呼煎茶酒來從甃社色香種種嘉三蕉素不勝  
於此油然加吾興適未盡夕陽何可斜

真州道中

真州城外路病馬走迴坡霜葉斑斕落風檣欵乃  
過鴈聲離地近山色隔江多不見紅妝弔屯田墓

若何

宿胡樹旃齋中

江上尋君笑語同夜闌頻剪一燈紅故人酒好傾  
難盡才子書多讀不窮鴈陣聲寒沙渚月菊花影  
亂紙牕風天涯此日連牀聚記取他年遞竹筒

金筠亭外翰寄示淮陰近詩索爲評次因  
書絕句於後

秋老長河葉皺波韓侯臺下刺船過客囊大比從  
前富添得新詩二寸多

東野吟成字字寒淮陰風物畧收完一編手把消



長夜不作詩看作畫看

長至日雨

葭管飛灰節茅簷雨點麤樹枯風喏烈天遠鴈糝  
糊薄耐聊成醉殘棉不煖軀日光無處驗一線果  
添無

寒夕

瓦注青燈焰焰光不眠人自耐宵長風過竹牖聞  
乾葉月上茅簷見重霜馬磨生涯憐許靖牛衣活  
計感王章更闌撥盡寒爐火濁酒如冰味不香

繡女行

記壬申十  
一月事

冬十一月歲欲徂江淮千里聞喧呼民間嫁娶忽  
一盡少長都不遲須臾窮鄉僻壤也驚噪豈惟大  
邑兼通都問何如此狼狽歟皆言阿女掌上珠嫁  
雞隨飛嫁犬走不則永巷終埋軀我昨臨濠抄邸  
報 詔選繡女誠非誣內大臣出各有地八旗所  
駐馳驛趨煌煌 天語皎如日未聞旁及漢氏姝  
若云祕旨更有說消息何從傳路衢六禮蒼茫一  
不備往返紅葉胥蠲除肩輿到門滿室娛但幸蛾  
眉既有夫竊聞洵騰至白下制府聞之爲歎吁榜  
文高張啼鷓鴣從來難曉惟羣愚天子採擇良家



姑將爲昭容爲婕妤玉環飛燕或所需那至概收  
鹽與嫫汝曹殊可無憂虞刻不容緩誰其驅得母  
慮辱門楣乎若真可怕至斯極椒房之戚狗不如  
咄哉怪事何代無

歲暮偶成二首

朔吹寒侵土牖虛歲華荏苒又將除絕無知契難  
開口空有窮愁未著書鴈陣遲過聲歷落梅花早  
放影蕭疎近來嬾癖加多少只恐嵇康比不如  
此生不復卜如何日月憑他忽忽過養病只嫌方  
藥少杜門翻愛雪花多殘爐煖戀將微火老甕香

憐乍熟醞餽歲人稀閒似衲小厖安穩在南柯

除夕得筠亭外翰詩約於梅花放日過訪

山莊率次其韻爲答

節序頻勞雪片催辛盤又復對寒壘不嫌舊曆拋  
人去只喜新詩到手來才逼鄭虔應號絕賦如庾  
信不須哀春風明日頭番到爲報梅花火速開

癸酉元日

牆角雪猶存春來氣未溫歲華驚轉瞬人事省荒  
村舊衲遮風弱新醪出甕渾不能都破例帖子也

題門



後園集年利卷十  
人日過僧寺

雪晴天似水靄靄見春光節好逢人日心閒對佛  
香園池初澹綠門柳漸輕黃鐘後思攤飯支公有  
卧牀

久不得趙丹其消息

河上分襟各一天兩年消息遂茫然耽吟自有驚  
人句不飲應餘買酒錢梅萼紅鬆辭臘早柳條黃  
軟得春先別懷易對東風起嬾讀江郎賦一篇

早春雨後溪上

紅日三竿上春從雨後生梅胎猶半束柳線已全

輕野燒微更色山禽漸有聲東風吹路燥不礙草  
鞋行

水仙花

亭亭玉立幾枝新  
斐几晴牕對有神  
傅粉知非何駙馬  
掃眉信是號夫人  
清離烟火林中氣  
澹得風流世外身  
韻奪海棠香奪蕙  
天將尤物占先春

聞董觀辰納姬却寄

鷗肋琵琶鴈柱箏  
蝦蟇陵下最知名  
短箋舊寫貽柯古  
半臂新裁奉子京  
天許佳人尋俊物  
世傳名士悅傾城  
風流果是無雙耦  
鄉號溫柔細締盟



後園雜詩卷一  
五  
梨花庭院捲蝦鬚管領韶華屬綠珠好事黃衫天  
外客知書紅粉內家姝畫欄雨潤茶蘼色隼几晴  
翻蛺蝶圖叅得國風章首義江都原是漢醇儒

朱雲濤枉訪山莊畱飲至夜明日過小園

縱觀花竹有詩見投因次原韻二首

報答春光放眼游題詩忙殺管城侯狂如杜牧難  
停屐曠比孫荆欲枕流縱少真人來白水也拚從  
事到青州登臨頗有畱君地楊柳絲絲綠小樓  
雨餘蟬螻橫青霄滑踏芒屨過幾橋鳥借盤桓差  
繾綣花煩慰問未蕭條池邊魚沫看常起衣上苔

痕拭不消收拾風情輸妙手新詞脫口有香飄

送蕭仞之京口

綠楊紅杏亂如雲野店山橋細草薰步步醉人非  
是酒此行東道有東君

金山脚下石磷磷泉汲中冷法豈新白足老能頻  
勸客黃頭郎勿苦催人

積陰幾日氣沉酣天喜新晴放蔚藍風便布帆安  
穩過郭公啼處是江南

雨牕愁坐二首

風頭呼少女終日雨淙淙午夢蛙千隊春愁燕一



雙澹香薰小像新  
耐漉深缸誰伴無  
聊客呻吟坐矮牕

老紅池上積春色  
二分休草濕沾桑  
扈林深躲粟畱  
文通原善恨平子  
故工愁況值茅檐  
下蕭條氣似秋

春日山行見一人  
家花樹繁盛鳥聲  
悠然意欣然欲往  
憇試叩之無應者  
戲成口號

書其壁上

山脚誰家結短垣  
竹籬茅舍幾間存  
鳥聲細答輕風韻  
花影濃沾宿雨痕  
試立烏呼春水岸  
都無人

應夕陽村不知子  
美操何術黃四娘  
容徑入門

清明有懷蕭仞

鵲鴿原畔送君行  
別不多時感已生  
江上水原無定止  
天涯人又過清明  
雨垂燕子聲聲重  
風捲桃花片片輕  
莫遣謝監夢春草  
船頭撥轉是歸程

雨中懷北村梨花

風信忽忽廿四過  
梨花村北正婆娑  
香疑韓壽衣邊少  
粉比何郎面上多  
氣味喜蒙蜂愛惜  
丰神愁被雨消磨  
春游又阻樊川屐  
孤負傾城恨若何

暮春雨中答母舅  
和仙先生時予將  
遊都



下  
百舌聲中倚曲欄春光一瞬又闌珊花枝已覺三分瘦雨氣猶存一點寒家有牛衣謀隱易世無狗監望知難饑驅北指桑乾渡孤負淮濱老釣竿  
登山臨水賦離家路指燕臺步步沙三月新愁憐燕子十年浪跡似楊花正平未可誇鸚鵡摩詰安能奏琵琶孟浪此行君莫問飄零有命在天涯

北游續稿序

吾友李子蒼存之始遊京師也以庚午其再也以癸酉既不售於有司畱三年越丙子復不售乃刺船而歸於洪澤之陂吟風詠月放意肆志焉築講堂於其居之後圃收拾囊底得近詩三百餘首編而鏤之噫嘻李子此行何其富於得也夫李子抱竒才能文章方其負書擔囊別家人而北也慨然有天下已任之志苟得良有司羅而致之廷處一官受一職出所具以效於時必有異焉者而李子初不得一遇是有司旣失李子李子子然歸呈猶



後園編年十卷終卷五  
褐衣耳失孰大焉雖然失於彼得於此文章者士  
之金玉珠貝錦繡纂組也多於已則榮華罕於已  
則賤辱其遊也以有文可獻故一來已而不遇則  
又來如以久於外無所合而文采不加富則是并  
失已也余讀此稿見其學殖深積才興颺發細於  
律而腴於詞出入古人寫厥性真使人瞰其瀾而  
莫測其涯固知李子之得益富矣昔歐陽子贈曾  
子固欲聞者弔有司之失而賀公之得夫人不第  
而有賀其言似迂然斯知己者之言也凡爲子固  
者悲焉余試則屢黜矣文益荒落視李子之善作

顏有慚色然則李子雖褐衣而歸其爲金玉珠貝  
錦繡纂組也多矣雖以賀可也康熙丁丑上元同  
學弟朱元英序



後園編年稿卷十一

盱眙李嶠瑞蒼存

北游續稿

起癸酉三月  
盡是年冬

北上至王家營寄別里中知舊

淮陰城背夕陽斜。破帽青衫薄笨車。千里道長初  
問驛。半分春在尚飛花。野溪萍動魚頭直。山店風  
輕燕尾叉。便與江淮殊景色。征人面上有烟沙。  
高低斥堠短長亭。天遣終年作客星。有命直須隨  
落拓。無成那敢怨飄零。草邊蝌蚪春嬉水。舟上鷓  
鷗晚晒翎。偏是旅愁消不得。故園回首數峰青。



關山直北指燕臺。雞肋心慙尚未灰。白晝霧疑連地起。黃河水信自天來。鶯花寂歷江淹恨。原野荒涼庾信哀。晨夕不同知己數。却從此地走蒿萊。

過紅花舖望謝允調山莊却寄

官道平如掌。風多四面沙。漸臨郊子國。早見謝敷家。地燥偏宜麥。春歸少剩花。君知余過否。馬上夕陽斜。

早行

雞唱四更頭。主人呼客起。仰天見有星。今日晴可喜。

策馬急登塗。茫茫春水漲。幸得近前山。一輪明月

上。

蒙陰旅店書壁

亞字城邊日欲晡。黃茅破屋歇征夫。沙藏飯底麤

如礪。茶出山中苦似茶。

蒙茶出蜀名山縣今魯人誤以蒙陰山中所出當之味苦甚不堪入口

十載風塵侵短鬢。半肩書劍累長鬚。短籬坐聽鶯啼處。花落棠梨四五株。

新泰道上雨後望山中出雲

夜雨愁從枕上聞。朝來驢背日如醺。誰知眼底開新境。不獨看山且看雲。



三月晦日泰山道中送春

驢背殘陽岱嶽邊。棟花風信忽翩翩。客從石罅行  
殊憊。春在天涯去可憐。三月未曾三日賞。一朝又  
了。一年緣。秦人碑下無窮樹。榆筴先拋祖道錢。

甕渡行

桃花三月春添水。汶河二里勝千里。兩岸相望似  
可過。中間逆浪兼天起。我停欸。段立沙邊襍被平  
頭亦下肩。就前欲渡不得渡。臨流四顧心茫然。裸  
袒諸公眠嬾動。口索青蚨要從重。公舟借問在何  
方。答曰請君今入甕。甕納餵糧貯酒漿。竈下盆罌

是輩行。奈何弄作彈丸戲。縱橫波面當輕航。山東  
健兒捷於鶻也似。江南人善沒。三五偕扶一甕游。  
須臾來往如浮筏。我雖魄懼意逡巡。別少他塗可  
問津。曲膝聳肩束縛坐。此日真成抱甕人。柳棉亂  
擲盤渦雪影射。雙眸兩頻瞥。吉凶禍福聽陽侯。性  
命鴻毛信輕絕。秦關蜀道猶登天。雲夢洞庭水浩  
然。千難萬險固堪怕。不離車馬兼舟船。未聞利涉  
中流疾。專用周朝慮。囚術壺天仙子幾時聞。柹渡  
高僧今日出。青蒲紫荇葉紛紛。鷓鴣鷓鴣各一羣。  
我今飄蕩大類汝。我又安詳不及君。家居百事都



由已人生偏不能知止此身幾許不爲魚蝸角肯  
拋何至此吁嗟乎蝸角肯拋何至此

黃河崖旅店中有女子杜瓊枝題詩署曰  
天涯女史不知何許人也味其詩意益聞  
人經亂而入於燕者予哀其意次韻於壁  
三山烽火照魚麗紅粉青蛾走亂離南渡已歸沙  
咤利東京誰贖蔡文姬淚殘豈惹生花日力盡琵琶  
上馬時風雨不消黃鵠怨天涯畱得斷腸辭

河間道中二首

浩渺畿南道蹉跎感客心地荒濃綠少風暴軟紅

深酒是他鄉味鶯非故國音飄蓬幾時歇莊鳥有  
愁吟

春去無多日清和候已移青腴蠶豆甲紫豔馬纓  
枝砂石驢蹄損琴書僕力疲將何消午渴茶值老  
僧施

入彰義門戲爲短歌

我別此門去三載茫茫離絕紅塵海初心揮手謝  
金臺一去從茲不復回誰意今來計中變又入此  
門走征電門高如天來往多只有騎驢人不便君  
不見神如龍迅如風金鞍玉



卽鄧通又不見聳如閣華如萼繡轂朱輪雲錦幙  
不是太平卽安樂腐儒被他擠下驢驢韁緊執立  
門隅良久乘間始乘上門乎門乎何有於腐儒

合肥公招集卧遊堂敬賦長句

馬踏沙堤足有風朝回十里火城紅不留事異盧  
懷慎能耐官如向敏中舊賜上樽傾一石新來樂  
府奏三終昇平輔相多餘暇江左風流斷屬公

晤常九疇敘舊述情得八截句爲贈

落魄金臺冷賣文相如敢自負凌雲春風花下三  
更酒記得當年始識君

四庫傳家富賜書北來門第數崔盧誰知句出玄  
卿口能使吳兒作小巫

花枝百簇筆頭開不說人間斗石才名在漢庭諸  
子右賈生新自洛陽來

馬首槐黃又送歸塗窮我亦拂征衣孝王城外雙  
魚少只聽諸生誦數飛

數飛君  
文集名

半肩行李走蕭蕭重到燕山更寂寥一見達夫先  
問訊

謂高  
孔霖

知君早已在青霄

上在幾多時玉樹青蔥占一枝才子尚傳鸚

鵲

尹羨鳳

汕



秋水神原絕世澄。官銜竚見一條冰。蘇瓌故自生  
蘇頲。賈至今知繼賈曾。

夕陽紅照軟塵高。范叔飄零氣不豪。車笠相逢非  
昔日。故人猶自認綈袍。

五月十一日覽鏡見白鬚一莖慨然有作  
覽鏡驚年長。明明見白鬚。萬般心未了。一點雪先  
欺。婚嫁逋猶重。詩書棄已遲。飄零何日止。老信已  
來時。

贈飲侯

韋平盛簪紱。又見俊民生。天與無雙格。人傳第五

名鳳應呼景禮龍。欲數慈明眼底層。霄路鵬飛羽  
翻輕。

芝蘭姿絕俗。出衆見風流。繡虎名誰敵。雕龍手獨  
優。家聲繩謝傅。世講愛楊修。落魄勞青眼。天涯忘  
滯畱。

送萬季野歸四明

靈光巍立踞儒關。述作功多在馬班。筆健應煩搜  
故事。書成且自貯名山。諸公得失然犀裏。勝國興  
衰指掌間。燕市軟塵侵已倦。尊鱸信到又思還。  
野史亭前萬軸鋪。布帆十幅賦歸歟。箋騰蠶尾心



常苦字見蠅頭眼不枯佳傳但憑輕蛟蝶長竿終  
釣舊珊瑚重尋賀監風流跡不用君王賜鑑湖

酬龔仲圭

我昔京華干薄祿文成不協當塗目歸去淮濱耕  
舊田生涯拚付南山麓碧浪掀天狎白鷗綠蓑掩  
背騎烏犢誰料饑驅計又變重跨長安驢尾秃鹽  
米功高赤道升文章運退黃楊縮四顧茫無顯貴  
投半廛仍就僧房宿枝棲隙地歎鷓鴣塵埽空廊  
驚蝙蝠寺門終日跽音絕二妙偏來慰幽獨謂君與晉公  
君也名家貴公子入洛依稀近小陸舌尖萬疊浪

層層筆上百叢花簇簇雲霄不許作鵬搏泥土還  
教同鵠伏憶昔端毅當朝日雞木深嚴秉鈞軸大  
開幸舍納賢豪愛士猶飢待梁肉平津閣下盛酒  
醪安昌堂後羅絲竹珠履紛紜時在門刻燭闔題  
夜常卜公逝於今二十載東山舊墅棋枰覆門生  
故吏滿天下大半官階登令僕獻賦蕭條計已非  
通家還往情誰熟練裙未易孝標憐斗粟那逢仁  
祖掬亡羊我固三太息窮途君亦何臧穀昨者臺  
臣上封事嚴詞大旨秋霜肅其言似欲廢成均罷  
遣生徒散山谷幸得諸公不主持尚許吾徒畱輦



轂若使臯夔竟議行非秦者去爲客逐執經安得  
入橋門路岐早作揚朱哭飄零失意且休恨暫免  
分飛便爲福

送孔東塘國博歸闕里摹御書

榛蕪吾道就衰微牛耳雞壇手獨揮桐已拚焦如  
我少眼能不白似君稀浪游薊苑人重聚出使燕  
山路又違猶喜皇華非異地只如休沐暫時歸  
魯宮新額照前除蚪蚪淋漓頡造初勒就久驚天  
煥采摹成應比帝重書鼠鬚體健分輕重戈脚  
形完間密疎半水待懸須報命秋風好返使臣

車

都下晤卓次厚因寄尊公火傳先生

班荆又向薊門天回首風塵別四年才子故應推  
繡口丈人聞尚未華顛山中歲月原無累湖上烟  
霞獨有緣石室書多應力著孟堅能爲叔皮傳

奉和吉水公東熊大司空原韻二首

薊苑初秋木未蒼羔羊退食興偏長雨過砌隙生  
魚婢葵落苔陰走蟻王門刺罷傳閒永晝方書任  
檢亂匡牀鄭公近日心如水不上岑臺也自涼

名  
卿臺



尺牘細字墨痕蒼詩語雙清各用長先後官聯凌  
范富往還風味敵裴王花分澹馥歸書帙竹送濃  
陰到硯牀巴客聽疑天籟響底須橫笛奏伊涼  
題雪中蕉梅圖  
蕉葉頽唐倚石稜疎梅小綻又層層雪中神味誰  
窺得此段風流屬右丞

次韻答劉鰲石

世情變甚浮雲駛客子窮愁應若此君何寒餓氣  
翻豪放筆塗鴉申側理我欲南歸不得歸來時楊  
柳記依依軟塵十丈日蒙面辜負淮干蟹稻肥

送梁質人往秦中

步屨入京師身猶失林鳥孤懷無與鳴刻意求朋  
好士聚輦轂下有如蠅附鮑冠蓋爛浮雲聲利爭  
紛擾往還豈不多但苦素心藐豫章僻西南客此  
人尤少敦龐其俗然稀走長安道君來從南豐超  
然出意表況乃與之言千秋事了了文章崔蔡驚  
議論丘軻飽子固遺風存徵君頗思紹

謂魏叔子也質人嘗游其門

師門得淵源詎非西江寶僧廬借繩牀埋頭度昏  
曉邂逅忽相遇把袂共傾倒蕭疎露丰神坦率示  
懷抱酒盞斟葡萄蟹筐劈瑪瑙君真可與交識君



恨不早如何指秦川又復跨驤裏百二古稱雄函  
關在天杪霜村吐黃花水驛發紅蓼去去三十程  
回首燕山小侯羸舊寓梁毛遂新過趙幸得適館  
賢可無彈鋏惱我行已倦游鄉園夢時繞先人畱  
薄田歸耕不待老後圃有講堂殘書足探討逝將  
息此間永絕風塵攪君許記之文諾如秋日皎南  
歸竚買舟西行應屬草別後鴈飛多勿令消息杳

九日長椿寺登高

古寺有高樓重陽到上頭揩磨千里目收拾一天  
秋夢幻隨新事壺觴就舊游茱萸何暇插飽啖內

黃侯

樹老秋聲聚僧廊夕照紅客塗佳節度心事故人  
同濩落憐寒鴈團圞話轉蓬時在坐皆下第客天涯且沉醉  
休負菊花叢

送方靈臯落第南歸

才筆推君自昔年薊門今始共周旋囊空只覺羊  
腸險賦就難逢狗監憐藥椀天涯多病客靈臯時初病起尊  
絲江上晚秋船盍簪未久先分袂空使文通意黯  
然

新城公招同魏禹平袁士旦查德尹陳叔



後園雜詩卷一  
毅殷彥來柯南陔飲集高齋賦呈四首

三年蓬轉離京華。帳隔扶風舊侍紗。獻賦重來遭  
白眼。開樽又許醉黃花。上台久共推丰度。餘論終  
須累齒牙。地望縱加情不改。談深屋角夕陽斜。  
履曳明光徹。帝聰朝回晏坐素絲風。斗山舊  
望尊韓子。桃李深恩賴狄公。塵辟軟紅居狹巷。酒  
傾重碧出新筒。敦盤執後聞精義。豈與南皮北海  
同。

屈輦車廡草連天。東閣遺踪久杳然。門峻不曾辭  
我入。塗窮何幸得公憐。計成畫虎終安用。名只雕

蟲却有緣。杖履追陪容竟日。秋風習習葉翩翩。  
分來清俸贍門牆。弟子成行列講堂。架擁賜書難  
數軸。爐添宮餅易生香。肥嘗紫蟹初離水。嫩啣黃  
芽飽受霜。仍與戴崇殊禮分。彭宣知己是安昌。

送袁士旦歸宣城

五柳

宛陵風雅國。近日似榛蕪。李白踪難繼。袁羊力起  
扶。書多裝玳瑁。筆妙架珊瑚。玉嶺千尋幹。天孫五  
色繡。探喉騰白鳳。出手握玄珠。謝氏居原近。梅家  
體畧殊。詞場洵健者。名士豈虛乎。我素知才子。君  
偏結腐儒。羣當空冀野。交頃定燕都。戴笠情親切。



挑燈話嘖嘖世情傾灑瀕吾道澹醜醜狗監憐雖  
少雞壇會每俱雅懷聯縞紵真氣透眉鬚城府何  
曾設風塵得不孤轉蓬禁日下泛梗合天隅未足  
稱詩侶容堪當酒徒益傾纜旦暮驪唱又須臾細  
雨他鄉鴈秋風故國鱸彌衡收敝刺阮籍返窮途  
舊劍駝疲蹇殘編負老奴但搜諸稿富那恨一錢  
無霧重天常暝霜深木漸枯山程排斥埃江水熟  
菰蒲客味經營嬾家園指顧趨仍應尋紀叟不必  
痛童烏時士旦方失子別夢縈襟帶離愁轉轆轤雙魚如有  
便一紙重冰壺

送甯晉公歸潁州

箋鋪露夕詠芙蓉記得濠梁識面初轉瞬八年成一  
夢短檠燈下伴殘書

海底珊瑚費力撈模糊一擲等鴻毛未逢白水真  
人面莫羨東方左史袍

持螯把酒菊花前失意天涯各自憐聽到陽關人  
又別青衫破帽路三千

風霜日夜逼秋寒兔目青黃鴨脚丹鄉夢幾生歸  
不得羨君騎馬渡桑乾

一肩行李去忽忽休望天涯賦轉蓬萊子身邊都



是綵荀家堂上孰非龍

鱸膾尊羹暫遣回明年還遲到燕臺綠珠不怕人

間少辦取明珠十斛來

晉公嘗言明年再入都門當買一姬故以為戲

### 輓高孔霖

辛苦長安客泉臺逝溘然醫無投病藥人贈買棺  
錢半世行多阻終身事可憐白頭衰母在雙目瞑  
何年

韻高羞適俗有意以文名老大何曾廢蹉跎究不  
成招魂歸故國齋志入佳城喪具誰經紀侯芭涕

泗橫

常九疇為孔霖高足於其卒也含殮賻贈皆身任之

### 送朱字綠游關中

文章聲價土泥間落魄年年只等閒橐盡不堪途  
子于秋高況是葉斑斕孟嘗愛客開新舍函谷連  
天指舊關未必此游真得計脫身且喜離燕山

### 夢家園竹生笋甚盛記以數語

我行作旅人久別家園竹昨夜黑甜中琅玕忽在  
目直節上干霄濃陰深覆屋蕭條涼颼吹歷落幽  
禽宿兒孫勝阿母不比前時秃居能常對君食可  
無須肉南歸未有期辜負篔簹谷

### 送躬暨外翰歸漢陽



與君交固聯荆棣與君窮亦如兄弟橐底蕭條無  
一錢蹇驢燕市青袍敝憶昔金臺初識君嶽嶽氣  
各凌層雲彌衡未肯便投刺侯喜頗自推能文只  
謂漢廷如此大狗監何難尋一箇誰知無命馬相  
如長門賦就人人唾詞場聲價賤鴻毛要津庭戶  
如天高抱膝但歌青玉案呈身忍奏鬱輪袍我去  
淮干君去楚消息三秋稀鴈羽黃鶴樓頭隔暮雲  
白蘋洲上愁春雨襍被今重聚 帝京軟紅堆裏  
又班荆所聞絕少快意事相見惟多太息聲宣武  
門前途一里還往半年勤屐齒健筆方搖五色花

鄉心倏繞三湘水我欲圖南未得南冷煖人情耐  
不堪收拾輕裝付奴子羨君且得歸江潭君雖官  
微非試吏首偕盤邊弄文字袞袞諸公請讓渠姑  
用伶人簡兮意十月燕山草木黃北風五兩送征  
航先公兩朝賜書在大別峰過見漢陽

久不得家問

落魄滯京邸愁心懸故廬終年枉爲客累月已無  
書木老霜痕重天高鴈影疎平安盼來信今夜夢  
何如

輓朱人遠



雞壇早歲闢荆榛五色花開筆有神書上慣爲秦  
逐客詩成何異楚騷人素車元伯期難赴黑鬢端  
明死竟真再到東山陪太傅風流雲散是前塵

子交

人遠從合肥公邸  
中故結語云然

一生蓬轉路艱難老就菟裘又蓋棺遺命有書呈  
漢武孤魂無詔慰方干禽魚事說纔麤理婚嫁逋  
聞未盡完望極天南歌薤露朔風吹雨暮江寒

移寓呈陳伊水裘循卓

半年踪跡逐征蓬纔落西街又轉東剩粟餘薪遺  
老衲殘書破硯負奚童班荆身喜逢聲子借廡心

慙累伯通敢謂鷓鴣棲便穩一枝且暫息霜風

次韻循卓寒夜共話

漫分白易與黃難總向長安住不安筆似江郎空  
作崇袍如范叔孰憐寒老盆釀熟燈花綠小院霜  
濃木葉丹且喜聯牀共形影相看不笑舊儒冠  
逆旅愁多就枕難更闌無夢到槐安樹梢月上當  
頭爽牕隙風來入骨寒萍梗命憑詩卷遣塵沙顏  
借酒杯丹雞棲聊寄臯家廡敢對人高子夏冠

循卓又和予再次韻二首

上林棲借一枝難三匝啼烏夜未安地正炊煤新



後園集卷之二  
三  
耐濁天將作雪敝裘寒。依人笑我同王粲。作令看  
君比范丹。墨綬青衫且姑耐。不須健羨鷄鶡冠。  
軟塵堆裏息肩難。針孔藏身那得安。索米無從方  
朔餓。耽詩有癖孟郊寒。眼枯漸有飛來翳。心死都  
如鍊過丹。壺口敢教如意碎。貢公久分不彈冠。

來章客都下五年頃始以沅江外翰歸楚  
於其行也得詩贈別二首

五載京華道風塵染客衣。不無新賦獻。僅得冷官  
歸。郢水帆初挂。燕山雪已飛。與君情不泛。分手意  
依依。

客久鄉思重。裝輕勢易行。霜收湘芷色。鴈帶楚騷  
聲。手板愁須執。頭銜喜近清。竒文滿囊載。分散與  
諸生。

投公凱學士四首

我生淮之南。地僻如邊鄙。側聞有鉅公。近在枚乘  
里。咫尺未請見。寸心徒仰止。束髮欽盛名。文場據  
堅壘。高山今在前。出謁通半紙。葑菲無一長。可能  
令公喜。

公從入翰林。聲華日挺出。資望館閣尊。述作班揚  
密。儒學受主知。前膝在宣室。青瑣任雍容。黃扉



待表率埽門位已高爲計似殊失誰知耐官人虛  
懷猶昔日

漢廷多蟬貂官貴施行馬士賤不許通誰曾開幸  
舍東閣容有人吾未之見也布衣識依歸惟公大  
陶冶愛士由至誠不在前人下董子信醇儒婁公  
真長者

昔我游京華投刺不欲嬾閱歷三數年始知殊可  
緩藏頭避風塵今來見人罕公才如海涵公心如  
道坦幸得系偶同宗盟似堪纂不然非慈明龍門  
敢希歛

題楊鳧令桐陰濯足圖

桐樹陰邊老蕩子雙楮赤脚臨流洗北方塵土踏  
多年今遇江南清淨水

并頭菊歌爲吉水公賦

牡丹富貴呼花王芍藥稱相名亦揚下至桃李杏  
梨輩大都得志搖春光花本屈指無慮萬只有菊  
耐嚴秋霜屈子昔時餐郢水陶翁舊日栽柴桑信  
乎花之隱逸也位置多在幽遐鄉我公立朝峻丰  
度才適世用今贊皇廟謨仰副太平運天子  
倚之爲棟梁冬官鳩工領喉舌不日且入中書堂



平泉草木縱鍾愛那能留意培清芳東籬風味乃  
欲占俸錢搜索存橐囊呼奴記遇市開日斜街京師  
花市揀買千株黃露零雨潤益滋息日曝風吹愁損  
傷壅根剪葉盡扶養朝回時自行端相北方氣  
候較晚晚藥如豆小過重陽胎肥舌綻徐吐秀十  
月纔得聞寒香天知我公嗜有在特令新樣生徑  
旁爛於明練大於椀一頭兩瓣交相當似麥岐穗  
出隴畔如蓮并蒂開池塘舊游未嘗謝蛺蝶別字  
應自名鴛鴦豔光閃鑠奪金麗高枝聳峙齊人長  
無語不爲同心笑有情欲學比目妝我公顧之喜

顏色潞州酒厚傾盈觴臯比坐擁鎮日對生徒環  
侍儼堵牆再三愛玩不離眼花亦有知神色強世  
間物態固多幻不得叱變惟論常極盛固應出竒  
怪菊如此者古未詳有之今日自公始公卽不受  
寧非祥有人添入種菊譜他年佳話傳無疆

與俞蒼文曹稼傳柯南陔楊鳧令小飲酒

肆戲題壁上

仇家肆裏酒如泉衣上緇塵杖上錢不用百篇惟  
一斗也堪消過歲寒天

風掀雪片撲青旗頗似高王入店時



世妓爲公各唱一篇詩

十一月初九日卧至四鼓而醒不復能寐  
枕上率成口號

愁多人醒四更天枕上呻吟那復眠霜透豈惟衾  
似鐵燈昏真覺夜如年浮名十載心灰矣遠道三  
冬信杳然萬事繞腸拋不下荒雞咿啞小牕邊

客有飲我以滇茶者詠之

粵人嚼檳榔滇人飲普洱飽餐得一甌彼固何如  
此

長至前三日嘉會莊辟寒雅集分賦

雞壇舊路久榛蕪點綴長安聚酒徒好事不同梁  
北路論交差比漢東都樽前吟速敲銅鉢雪後寒  
深熟瓦爐佳會天涯愁晝短夕陽一線漸添無  
蠻箋彩筆潑濃香此事今誰最擅場七子故須推  
應阮五君未必附山王他鄉飄泊憐萍梗同調追  
隨耐雪霜作達放顛無不可柘枝傾倒在諸郎優人

有沈周二郎者新來  
自南中一時稱絕

歲暮憶小兒女有作二首

浪游踪跡比浮雲兒女終年信不聞多病維摩憐  
月上窮途子美念宗文燈前理線工應熟紙尾塗



後園集卷之二  
一  
鴉力合歎千里寸心輓轡轉歲殘風雪又紛紛  
辛苦無端逐轉蓬天涯荏苒一年終癡兒自觸陶  
元亮嬌女偏牽左太冲就枕便多逢若輩當筵可  
解憶而公空思謝氏家庭事消息何嘗得便鴻



